



Jumat, 27 Januari 2023

Ogen: Masmur 107:1



Katakenlah Bujur



Lit 3 kata ajaib si perlu teptep wari sibelasken man teman, pasangen geluh, anak bage pe kalak si ijumpai kita, e me sentabi (maaf), keleng ateku kam ras bujur. Teluna kata e mbelin kal gunana i bas mbina hubungan si mehuli ras mpekena hubungan si ceda. Tapi ateta pokus ku bas kata si arah pudina e me ngatakan bujur.

Kalak si ngatakan bujur e me si mereken respon mehuli nandangi kai si lit i bas ia ras uga kecibalenna paksa e. Ngatakan bujur iperlukan labo saja alu erbelas i bas sialoken pemere kalak ras erkiteken isampati kalak, tapi arus rikut ras pusuhta si bersih ngergaken kai siialoken ras kai siibahan kalak sideban e. Pemasmur nuruh kita lalap ngatakan bujur man Tuhan, sabap rasa lalap kiniulinNa. Masmur enda ngajari kalak guna muji Tuhan erkiteken ipulahi i bas ketertabanan arah situasi si mberat ras cilaka. Tuhan pasti mperdiateken kiniseran perpulungenNa adina umatNa e tetap ertoto ras ngatakan bujur. Erbage-bage perbeben jadi, muas melehe (ay.4-9), perbudaken (10-16), sakit mekelek menam mate (ay.17-22) ras badai (23-32). Ngatakan bujurlah tetap amin gia i bas kepicaretan sabap e mbangun kinitekenta ras njemba kita tetap ernalem man Tuhan.

Lit 5 keuntungan rusur ngatakan bujur; 1. Sehat mental, sabap nguraki emosi negative bagi mecimberu, cian ras ate segat, stress ras trauma. 2. Mbue teman ras mpegegehi hubungenta ras kalak sideban. 3. Kula pe sehat, semangat ras aktif. 4. Percaya diri ras semangat. 5. Kalak sideban jadi mehuli man banta. *Katakenlah bujur man Tuhan erkiteken kiniulinNa, keleng ateNa tetap rasa lalap.* Ngatakan bujur i bas si mehuli bage pe si kurang mehuli, sabap kerina banci ipake Tuhan ngerehken si mehuli man banta.